

Morning Dogri (NSD) National News Bulletin 18-07-2024

आकाशवाणी

खबरां पूजा वजीर कोला।

1. महाराष्ट्र दे गड़चिरोली जिले च पुलस कन्नै होए दे इक टाकरे च घट्टोघट्ट 12 मोआवादी मारे गे न।
2. राष्ट्रपति द्रौपदी मुर्मू हुंदे कार्यकाल दे पैहले ब'रे थमां 75 महत्वपूर्ण भाषणें दे संकलन—Wings to our hopes volume one दा विमोचन अज्ज नमीं दिल्ली च कीता जाग।
3. विदेश मंत्री डॉ. एस.जयशंकर होरें मॉरिशस च भारत दे पैहले ऐसे जन औषधि केन्द्र दा उद्घाटन कीता ऐ जेहड़ा विदेश च स्थित ऐ।
4. भारती नौसेना नै ओमान दे समुंद्री कंडे दे नेड़े डुब्बे दे तेल टैंकर थमां 8 भारतीयें सनें चालक दल दे कुल 9 सदस्यें गी बचाई लैता ऐ।
5. स्वीडिश ओपन प्रतियोगिता दे प्री-क्वार्टर फाइनल च अज्ज भारत दे सुमित नागल दा मकाबला अर्जेटीना दे मरियानो नवोने कन्नै होग।

<><><><><><>

Maharashtra

महाराष्ट्र च गड़चिरोली-छत्तीसगढ़ बन्ने कन्नै लगदे इटापाल्ली च कल संजा गड़चिरोली पुलस आस्सेआ नक्सलवाद विरोधी कारवाई च 12 मोआवादी मारे गे न। वनडोली ग्रां दे जंगलें च नक्सलिंग पुलस दल पर तपाशी अभियान दरान गोलियां चलाइयां। पुलस नै बी जवाबी कारवाई च गोलियां चलाइयां। गड़चिरोली एस.पी. निलोतपाल होरें दस्सेआ जे इस टाकरे च 12 नक्सली मारे गे न ते तपाशी अभियान होर तेज करी दित्ता गेआ ऐ। पुलस नै मारे गेदे 12 नक्सलिंग दी लोथां बरामद कीतियां। एहदे इलावा 3 एके-47 रैफलां, 2 आईएमएसएस रैफला, 1 कारवाईन ते 1 आपू आटोमैटिक तरीके कन्नै अपलोड होने आली रैफल बरामद कीती गई ऐ। इक टाकरे च 1 पुलस सब-इंस्पेक्टर ते 1 हवलदार जख्मी होए न, जिनेंगी इलाज आस्तै नागपुर भेजेआ गेआ ऐ। महाराष्ट्र दे उपमुख्यमंत्री ते गृहमंत्री देवेन्द्र

फडनवीस होरें आखेआ ऐ जे पिछले किश बरें चा ऐ इक बड्डा नक्सलवादी विरोधी टाकरा ऐ। उनें गड़चिरोली पुलस दी बहादुरी करियै उंदे आस्तै 51 लक्ख रपे दा इनाम घोषत कीता ऐ।

<><><><><><>

President

“ Wings to our hopes” पैहला संस्करण नां दी किताब जेहदे च राष्ट्रपति द्रौपदी मुर्मू हुंदे कार्यकाल दे पैहले बरे दे 75 महत्वपूर्ण भाषणें गी शामिल कीता गेआ ऐ, दा विमोचन नमीं दिल्ली च अज्ज होग। केन्द्री राई-बाई मंत्री शिवराज सिंह चौहान होर इस ई-किताब दा विमोचनसूचना ते प्रसारण मंत्री अश्विनी वैष्णव हुंदी मजूदगी च करगन। प्रकाशन प्रभाग तरफा प्रकाशित एह किताब दवै हिंदी ते अंग्रेजी भाषा च जारी कीती जाग।

<><><><><><>

Jaishankar

विदेश मंत्री डॉ. एस.जयशंकर होरें कल मॉरिशस च भारत दे पैहले ऐसे जनऔषधि केन्द्र दा उद्घाटन कीता जेहड़ा विदेश च स्थित ऐ। मॉरिशस दे प्रधानमंत्री प्रविंद कुमार जुगनाथ बी इस मौके पर उंदे कन्नै हे। सोशल मीडिया पर इक पोस्ट च डॉ. जयशंकर होरें आखेआ जे इस औषधि केन्द्र दी स्थापना दा वादा प्रधानमंत्री नरेन्द्र मोदी होरें इस बरे च शुरू कीता हा जिसी हुन पूरा कीता गेआ ऐ। उनें इब्बी आखेआ जे भारत-मॉरिशस दे ग्रैंड बोआ खेत्तर च भारत दी आर्थिक मदाद कन्नै बनी दी मैडिकिलनिक परियोजना दा बी उद्घाटन कीता ते इसी आपसी दोस्ती दी हालिया अभिव्यक्ति करार दित्ता। इस मौके पर डॉ. जयशंकर होरें आखेआ जे मैडिकिलनिक खुल्लने कन्नै ग्रैंड बोआ खेत्तर च 16 जहार लोकें गी माहिराना इलाज दियां सेवां बी मिलगन। इस पर गर्व मसूस करदे होई विदेश मंत्री होरें आखेआ जे सेहत साढ़े सब्बनें लेई प्राथमिकता दा खेत्तर ऐ ते एहदे प्रति अस सब्बै जागरूक होए आं।

<><><><><><>

Haryana

हरियाणा सरकार नै एलान कीता ऐ जे पुलस, खुदाई ते जेल विभाग दे किश औहदें च नियुक्ति पर अग्निवीरें गी 10 फीसदी क्षैतिज आरक्षण दित्ता जाग। मुख्यमंत्री नायाब सिंह सैनी होरें एह घोषणा कल चंडीगढ़ च इक प्रेस वार्ता दरान कीती। सैनी होरें आखेआ जे कोई औद्योगिक इकाई अग्निवीरें गी 30 जहार रपे हर महीने दे स्हाबै कन्नै तनखाह दिंदी ऐ ते सरकार उस औद्योगिक इकाई गी सलाना 60 जहार रपे दी सब्सिडी देग। एहदे इलावा मुख्यमंत्री होरें आखेआ जे अग्निवीर अपना उद्यम शुरू करदे न ते उनेंगी 5 लक्ख रपे तगर दा लौन बगैर ब्याज दे उपलब्ध करोआग। अग्निवीरें गी थेआरें दा लाइसेंस बी प्राथमिकता दे आधार पर दित्ता जाग। कुसै दुर्घटना दे हालात च भारत सरकार दी शिड़क परिवहन स्कीम हेठ मुआवजा ते मुक्त ईलाज दी सहूलियत बी दित्ती जाग।

<><><><><><><><>

SC-NEET Hearing

सुप्रीम कोर्ट च अज्ज नीट अंछर ग्रेजुएट 2024 मतेयान दे विवाद कन्नै जुड़ी दिएं याचिकाएं दी सुनवाई तैह कीती गई ऐ। एहदे शा पैहले जंदी 11 जुलाई गी सर्वोच्च अदालतै एह मतेयान रद्द करने परतियै मतेयान करोआने ते इस मतेयान दे आयोजन च कथित गड़बड़िं दे मामले सनें सब्बनें याचिकाएं पर सुनवाई स्थगित करी दित्ती ही। अदालतै केन्द्र सरकार ते एनटीए दी तरफा किश धड़ें गी जोआब नेई दित्ते जाने गी दिक्खदे होई सुनवाई अगड़ी पाई दित्ती ही। प्रधान न्यायधीश डी.वाई.चन्द्रचूड़, न्यायमूर्ति जे.बी.पारदीवाला ते न्यायमूर्ति मनोज मिश्रा हुंदी खंडपीठ 40 शा मती याचिकाएं पर सुनवाई करोग। इंदे च बक्ख-बक्ख हाई कोर्टें च बकाया मामले गी सुप्रीम कोर्ट च भेजने दे सरबंघें च एनटीए दी तरफा दायर कीती गेदियां याचिकां बी शामिल न।

<><><><><><><><>

Encounter Doda

डोडा जिले दे जंगली इलाकें च सुरक्षाबलें ते आतंकवादिं बश्कार टाकरा भखी गेआ ऐ। एह टाकरा रातीं 2 बजे काश्तीगढ़ इलाके च शुरू होआ। आतंकवादिं सरकारी स्कूल च कायम सुरक्षा बलें दे आरजी शिविर पर गोलियां चलाइयां। एह आरजी शिविर चला'रदे तपाशी अभियान दे चलदे कायम कीता गेआ हा। इस टाकरे च 2 सैनिक घायल होए न। खीरी खबरां थोने तगर दपक्खी गोलीबारी जारी हीं देसा ते एहदे आले दुआले दे जंगलेंच तपायी

अभियान चलाया गेआ हा। सोमवार ते मंगलवार दी मझाटली रातीं भखे दे टाकरे च सेना दे चार जवान शहीद होई गे हे।

<><><><><><>

Indian Navy Oman

भारती नौसेना दे युद्धपोत आईएनएस तेग नै ओमान दे समुंद्री कंडे दे नेडे डुब्बे दे तेल टैंकर थमां कल 8 भारतीयें सनें चालक दल दे 9 सदस्यें गी बचाई लैता ऐ। कोमोरास झंडे आले तेल टैंकर M.V. Prestige Falkan च 13 भारती ते श्रीलंका दे 3 लोकें सनें चालक दल दे 16 सदस्य शामिल हेफ। बाकी लोकें दी तलाश जारी ऐ। टैंकर दे पलटने परैंत खोज ते बचाह आले जतनें लेई भारती नौसेना दे युद्धपोत ते पी-8 आई समुंद्री गश्ती ज्हाजै गी भेजेआ गेआ ऐ। टैंकर रास भद्रकाई थमां तकरीबन 25 समुंद्री मील दक्खन-पूर्व च पलटोई गेआ हा। भारत दे राजदूती दफ्तरै मूजब उनें ओमान दे अधिकारिएं कन्नै लगातार राबता बनाए दा ऐं ओमान दे समुंद्री सुरक्षा केन्द्र ते भारती नौसेना आस्सेआ इस इलाके च खोज ते राहत बचाह अभियान चलाया जा करदा ऐ।

<><><><><><>

IMD

भारती मौसम विभाग नै दक्खन-अंदरूनी कर्नाटक, तटीय कर्नाटक, सौराष्ट्र ते कच्छ, कोंकण ते गोवा च खरी मती बरखा पौने दी मेद जतांदे होई रैड अलर्ट जारी कीता ऐ। दस्सेआ गेआ ऐ जे तमिलनाडू, पुदुचेरी, काराइकल, केरल, माहे, तटीय आंध्रप्रदेश ते यमन च अज्ज भारी बरखा होने दी पेशगोई करदे होइ ओरेंज अलर्ट जारी कीता ऐ। उत्तराखंड, गुजरात ते पूर्वी राजस्थान च बी शैल बरखा पेई सकदी ऐ।

<><><><><><>

Tennis

स्वीडिश ओपन टेनिस प्रतियोगिता दे प्री-क्वाटर फाइनल च अज्ज भारत दे पैहले नंबरै दे खडारी सुमित लागल दा मकाबला दुनिया दे 36में नंबरे दे खडारी अर्जेटीना दे मरियानो नवोने कन्नै होग। एह मैच अज्ज दपैहरी स्वीडन दे बस्ताद टेनिस स्टेडियम दे सेंटर-कोर्ट च

खेड़डेआ जाग। एहदे शा पैहले मंगलवारें सुमित होरें स्वीडन दे एलियास यमेर गी 6—4, 6—3 कन्नै हराइयै प्री—क्वार्टर फाइनल च अपनी थाहर बनाई लेती ही।

<><><><><><>

Rohan Bopanna

होमबर्ग ओपन, टेनिस च रोहन बोपन्ना ते एन.श्रीराम बालाजी हुंदी जोड़ी दा मकाबला जर्मनी दी जाकोब चनाएट्टर ते मार्क वाल्नर दी जोड़ी कन्नै अज्ज संजा'लै होग। प्रतियोगिता दे पैहले राउंड च एह खडारी अज्ज आमने—सामने होंगन। भारती जोड़ी औने आले पेरिस ओलंपिक च बी होग।

<><><><><><>

Jatinder Singh

पिंशने सरबंधी मामले ते पिंशनी आई चुके दे मलाजमें दी भलाई बेहतरी सरबंधी मैहकमा इस महीने दी 19 तरीक गी जम्मू दे कन्वेंशन सेंटर च रटैरमेंअ कोला पैहले आले परामर्श सरबंधी 54मीं कार्यशाला दा सरिस्ता करा करदा ऐ। एह कार्यशाला प्रधानमंत्री हुंदे दफतरे च राज्यमंत्री ते पिंशनरें ते कार्मिक मामले दे मंत्री डॉ. जितेन्द्र सिंह हुंदी मजूदगी च लोआई जाग। इस कार्यशाला च निकट भविक्ख च रटैर होने आले मलाजमें गी पिंशन मंजूरी दी प्रक्रिया ते रटेरमेंट दे बाद हासल होने आले फायदे दे बारे च जागरूक कीता जाग। मैहकमा केन्द्र सरकार दे मलाजमें लेई इस चाल्ली दे कार्यक्रम आयोजत करदा ऐ तां जे उनेंगी रटैर होने कोला पैहले गै सारी प्रक्रियाएं दे बारे च दस्सी दित्ता जा तां जे समें सिर उंदी पिंशन बी लग्गी जा ते कन्नै रटैर होने दे बाद आले सारे लाह बी एह मलाजम हासल करी सकन।

<><><><><><>

Cricket

आईसीसी मट्रें दे टी—20 बल्लेबाजी रैंकिंग कल जारी कीती गई जेहूदे च भारत दे सूर्य कुमार यादव होर दुए थाहर पर बने दे रेह ते यशस्वी जयसवाल होर 6में थाहर पर रेह। दृ तुराज गायकवाड़ होर इक थाहर हेठ आइयै 8में नंबर पर रेह। भारतीय खडारिएं गी टी—20 श्रृंखला च जिम्बावे खिलाफ 4—1 दी बढ़त कन्नै नमीं बल्लेबाजी रैंकिंग च फायदा होआ ऐ।

<><><><><><>

Block Diwas Rajouri

राजौरी दे जिला विकास आयुक्त ओ.पी.भगत होरें थन्नामंछी च लोकें तगर पुज्ज बनाने लेई ब्लाक दिवस प्रोग्राम तैह्त्त शिविर च हिस्सा लैता। उनें सरकारी सेवाएं च पारदर्शी, जवाबदेही ते लोकें दे घरें दे कोलकाल सेवा उपलब्ध करोआने लेई प्रशासन दी वचनबद्धता जाह्र कीती। शिविर दरान लोकें ते उंदे नुमायंदे आस्सेआ बक्ख-बक्ख मामलें गी पुट्टेआ गेआ। डिप्टी कमीशनर होरें लोकें दे मसलें गी ध्यानै नै सुनेआ ते लोकें गी भरोसा दोआया जे उंदे जायज मसलें दा समें बद्ध ढंगै सिर पक्क गै हल कीता जाग। श्री भगत होरें लोकें गी बक्ख-बक्ख सरकारी स्कीमें ते प्रोग्रामें बारे दस्सने ते उनेंगी अगगे आइयै इनें स्कीमें थमां लाह् ठोआने लेई गलाया।

<><><><><><>

Gold Smuggling

भारत तिब्बत बार्डर पुलस आईटीबीपी नै पूर्वी लद्दाख च सिरीगैपल इलाके थमां सुन्ने दे किलो-किलो दे 108 इट्टां बरामद कीतियां न। आईटीबीपी नै अपने इक सोशल मीडिया पोस्ट राएं जानकारी दित्ती ऐ जे बल दी 21मीं बटालियन दे डिप्टी मकांडेंट दीपक भट्ट हुंदी अगुवाई च गश्त करा'रदी टीम नै इस सिलसिले च दऊं संदिग्धे गी फगड़ेआ ऐ ते पुच्छ-गिच्छ जारी ऐ।

<><><><><><>